



Broj, 01/21-02-2276/23
Sarajevo, 19.9.2023.godine

ZAPISNIK

s 5. sjednice Odbora za boračka i invalidska pitanja Predstavničkog doma Parlamenta Federacije BiH, održane 19.9.2023.godine

Sjednica Odbora za boračka i invalidska pitanja počela je u 12:00 sati u zgradi Parlamenta Federacije Bosne i Hercegovine, u ulici Hamdije Kreševljakovića br.3, Sarajevo.

Sjednicom je predsjedavao predsjednik Odbora Bajramović Halil.

Prisutni članovi: Halil Bajramović, Almedin Aliefendić, Mijo Matanović, Amra Junuzović-Kaljić, Dragan Mioković, Razim Halkić, Hamdija Abdić, Drago Stanić i Fahrudin Skopljak.

Odsutni članovi: Mario Karamatić i Hajrudin Žilić.

Gosti: Adnan Delić, ministar, Kenan Spahić, pomoćnik ministra, Ministarstvo za rad i socijalnu politiku FBiH; Mirza Terzo, Ibrahim Ganibegović, Ministarstvo za pitanje boraca i invalida odbrambeno-oslobodilačkog rata FBiH; Muhamed Švrakić, predsjednik udruženja Zelene beretke; Sulejman Vranj, predsjednik Saveza udruženja boraca Patriotske lige i Murat Silajdžija, organizator otpora.

Prisutnošću dovoljnog broja članova na sjednici Odbora ispunjeni su uvjeti za valjani rad u pogledu kvoruma i odlučivanja.

Odbor za boračka i invalidska pitanja Predstavničkog doma Parlamenta Federacije BiH (u daljem tekstu: Odbor), na 5. sjednici, održanoj 19.9.2023. godine, razmatrao je sljedeći:

DNEVNI RED

- 1. Usvajanje Zapisnika sa 4.sjednice Odbora;**
- 2. Prijedlog Zakona o ujednačavanju penzija osvarenih po Zakonu o službi u Oružanim snagama Bosne i Hercegovine- hitni postupak,**
- 3. Nacrt Zakona o izmjenama i dopunama Zakona o pravima demobilisanih branilaca i članova njihovih porodica,**

4. **Inicijativa za donošenje izmjena i dopuna Zakona o posebnim pravima dobitnika ratnih priznanja i odlikovanja i članova njihovih porodica koju je pokrenuo Senad Mašetić;**
5. **Tekuća pitanja.**

Z A P I S N I K

Dnevni red je jednoglasno usvojen.

Ad 1.

Zapisnik sa prethodne sjednice Odbora je jednoglasno usvojen.

Ad 2.

Predsjednik Odbora je obrazložio 2. Prijedlog Zakona o ujednačavanju penzija osvarenih po Zakonu o službi u Oružanim snagama Bosne i Hercegovine- hitni postupak te istakao da ovaj zakon reguliše način i postupak ostvarivanja prava na djelimično usklađivanje iznosa penzija za profesionalne vojne osobe u Oružanim snagama Bosne i Hercegovine, na osnovu Zakona o službi u Oružanim snagama BiH. Korisnici su osobe koje ispunjavaju određene uslove i ostvaruju pravo na penziju prema Zakonu o službi u Oružanim snagama Bosne i Hercegovine, počevši od 1. marta 2018. godine. Zakon propisuje da će korisnicima prava koji ostvare penziju nakon stupanja na snagu ovog zakona, zakonski iznos penzije biti povećan za 29%, a daljnje usklađivanje će se provoditi u skladu sa odredbama Zakona o penzijskom i invalidskom osiguranju. Za one koji su prava na penziju ostvarili između 1. marta 2018. godine i dana stupanja na snagu ovog zakona, iznos penzije će biti povećan za 29% i dalje će se usklađivati sukladno Zakonu o penzijskom i invalidskom osiguranju. Prema zakonu, pravo na penziju korisnicima prema članu 3. ovog zakona pripada od 1. januara 2024. godine, a Federalni zavod za penzijsko i invalidsko osiguranje provodi postupak određivanja visine penzije u skladu s ovim zakonom. Sredstva potrebna za ostvarivanje prava iz ovog zakona osiguravaju se iz budžeta Federacije Bosne i Hercegovine. Suština ovog obrazloženja je da se analizira finansijski uticaj primjene Zakona na godišnjem nivou od 2024. do 2033. godine, pri čemu se ističu faktori poput rasta plaća pripadnika OS BiH, usklađivanja penzija te stope mortaliteta kao ključni faktori. Također, naglašava se da će primjena ovog Zakona zahtijevati određene iznose novčanih sredstava u navedenim godinama i da će to biti važno za budžetsko planiranje. Također se spominje da će zakon biti usklađen s evropskim zakonodavstvom. Za riječ se javio Mijo Matanović te izrazio zabrinutost zbog toga što je ovaj zakon upućen u hitnom postupku. Pomoćnik ministra za rad i socijalnu zaštitu, Kenan Spahić je istakao da su pribavljena potrebna mišljenja od Ureda za zakonodavstvo, Ministarstva pravde kao i Ministarstva finansija te su mišljenja da hitna procedura neće uzrokovati osporavanje zakona. Almedin Aliefendić je postavio pitanje predstavnicima Ministarstva za pitanje boraca i invalida odbrambeno-oslobodilačkog rata FBiH da li će ovaj Zakon proizvesti negativnu reakciju ostalih kategorija, prije svega penzionera, te istakao da je mišljenja da je finansijski aspekt ovog Zakona neprecizno predstavljen. Ministar Adnan Delić je istakao da je postignut apsolutni konsenzus svih zainteresovanih strana prilikom izrade ovog Zakona kao i finansijskog proračuna.

Almedin Aliefendić je također istakao da usvajanjem ovog zakona se ne eliminiše diskriminacija, već će njegovo usvajanje biti jedan značajan korak ka tom cilju.

Dragan Mioković je podržao usvajanje ovog Zakona te istakao da zakoni kao što je ovaj ne trebaju biti predmet politizacije, nego da je potrebno usmjeriti se na korist krajnjih korisnika zakona i sprječavanju diskriminacije.

Odbor za boračka i invalidska pitanja Predstavničkog doma Parlamenta FBiH je razmotrio Prijedlog Zakona o ujednačavanju penzija osvarenih po Zakonu o službi u Oružanim snagama Bosne i Hercegovine- hitni postupak te jednoglasno donio sljedeći:

ZAKLJUČAK

Odbor za boračka i invalidska pitanja Predstavničkog doma Parlamenta FBiH podržava donošenje Prijedloga Zakona o ujednačavanju penzija osvarenih po Zakonu o službi u Oružanim snagama Bosne i Hercegovine- hitni postupak i predlaže Predstavničkom domu njegovo usvajanje.

Ad3.

Predsjednik Odbora je dao riječ predstavnicima Ministarstva za pitanje boraca i invalida odbrambeno-oslobodilačkog rata FBiH, koji su zajedno sa predsjednikom Odbora obrazložili Nacrt Zakona o izmjenama i dopunama Zakona o pravima demobilisanih branilaca i članova njihovih porodica. Ovaj nacrt zakona, pod nazivom "Zakon o izmjenama i dopunama Zakona o pravima demobiliziranih branilaca i članova njihovih porodica", predstavlja temeljne promjene i dodatke postojećem zakonu koji regulira prava demobiliziranih branilaca i njihovih porodica u Federaciji Bosne i Hercegovine. Nekoliko ključnih promjena u ovom nacrtu zakona uključuje: Promjene u uslovima za ostvarivanje egzistencijalne naknade: Starosni prag za demobilizirane branioce koji žele ostvariti pravo na mjesečnu egzistencijalnu naknadu povećava se sa 65 godina na 57 godina života. Dodatni uslov je da su bili pripadnici Oružanih snaga najmanje 12 mjeseci; pravo na naknadu za supruge umrlih branitelja: Supruge umrlih demobiliziranih branitelja sada imaju pravo na egzistencijalnu naknadu, bez obzira na svoj dohodak, pod uslovom da su umrli branitelji bili pripadnici Oružanih snaga najmanje 12 mjeseci i da supruge imaju određeni starosni prag; novi način usklađivanja iznosa naknade: Iznos mjesečne egzistencijalne naknade će se sada usklađivati prema stopi rasta potrošačkih cijena i realnog bruto društvenog proizvoda u Federaciji BiH. To će omogućiti da se iznos naknade prilagođava ekonomskim uvjetima. Nacrt zakona predviđa ukidanje određenih finansijskih ograničenja i limita za isplatu egzistencijalnih naknada, što bi moglo omogućiti većem broju ljudi da ostvare ovo pravo. Očekuje se da će ovaj nacrt zakona omogućiti dodatnih 3000 ljudi da ostvare pravo na egzistencijalnu naknadu.

Almedin Aliefendić je istakao da je vrlo bitno da Ministarstvo potvrdi da su predstavnici krovnih organizacija saglasni sa ovim izmjenama i dopunama Zakona. Također je istakao da je ovaj Zakon potrebno podnijeti po hitnoj proceduri.

Odbor za boračka i invalidska pitanja Predstavničkog doma Parlamenta FBiH je razmotrio Nacrt Zakona o izmjenama i dopunama Zakona o pravima demobilisanih branilaca i članova njihovih porodica te jednoglasno donio sljedeći:

ZAKLJUČAK

Odbor za boračka i invalidska pitanja Predstavničkog doma podržava donošenje izmjena i dopuna Zakona o pravima demobilisanih branilaca i članova njihovih porodica, uz prijedlog Vladi FBiH da se ovaj Zakon podnese i usvaja po hitnom postupku, a ne u formi nacрта.

Ad4.

Odbor za boračka i invalidska pitanja je ovu inicijativu razmatrao na jednoj od prethodnih sjednica te donio zaključak da će raspraviti o istoj kada podnosilac inicijative bude prisutan. Kako podnosilac inicijative, Senad Mašetić je bio spriječen da prisustvuje sjednici Odbora, poslao je pismeno svoje izjašnjenje i stav o istoj. U sveobuhvatnoj raspravi su učestvovali članovi Odbora i predstavnici udruženja.

Odbor za boračka i invalidska pitanja Predstavničkog doma Parlamenta FBiH je razmotrio Inicijativu za donošenje izmjena i dopuna Zakona o posebnim pravima dobitnika ratnih priznanja i odlikovanja i članova njihovih porodica koju je pokrenuo Senad Mašetić, te jednoglasno donio sljedeći :

ZAKLJUČAK

Traži se od Vlade Federacije Bosne i Hercegovine da preispitaju odredbe Zakona o posebnim pravima dobitnika ratnih priznanja i odlikovanja i članova njihovih porodica u kontekstu izvođenja organizatora otpora iz prava te je stav Odbora za boračka i invalidska pitanja Predstavničkog doma Parlamenta FBiH da je to nedopustivo.

Ad5.

O ovoj tački dnevnog reda nije bilo rasprave.

Sjednica Odbora završila je s radom u 13:45 sati.

PREDSJEDNIK ODBORA

Halil Bajramović s.r.